

紅爐點雪卷之二

豫章儒醫

應圖龔居中著

鍾陵

槐璠曾師誠 叅

吳中

二然朱陶性 較

火病結核

夫結核者相火之所爲痰火之徵兆也凡人病此不知預治鮮有不致危者何也蓋以腎水先虧相火隨熾熏迫津液凝聚於皮膚之下肌肉之上似癰非癰

不紅不腫不甚痛苦久而乃潰人多怠忽其爲證也
初或寒熱似瘧形容憔悴久則肌肉漸消咳嗽失血
內具潮汗遺滑等證蜂集見焉治之之法亦必益水
清金滋陰抑陽兼以開結理氣之品務使水升火降
津液流通核消塊散庶無後慮矣倘因循失治至於
肌肉脫盡形體尪羸塊腐核爛勢若壞都可復禦乎
慎之慎之

愚謂結核之由與瘡瘍癰毒之類大異倘誤治之

爲害非細何則經曰諸痛癢瘍皆屬心火以裏
火迫血而成者此實證也治法未潰者則宜
解毒或以苦寒驅毒之藥攻下已潰者則宜排膿
內托膿散毒解則愈若夫結核則不然蓋始於真
陰先虧相火燔蒸熏迫精液拂結凝聚日積月累
乃成故久而不潰此虛證也初無痰火諸證形體
如故而但見核者惟在開結降火消痰理氣核消
結散則已猶火迫鹵而爲齰得水浸潤復解之義



若初猶豫怠忽致諸核遍潰形體消瘦則潮汗遺
血自是蜂起矣此蓋陰虛之極相火益炎所以致
陽愈急而微陰亦自難存故氣散血聚以致諸核
遍潰或無完膚者有之當此之際治必本而標之
乃曰圓神法以清金益水爲君抑陽養陰爲佐開
結降火爲使必使水升火降津液流通潰者斂而
結者散庶亢害承制五臟氣平是猶寒谷一枝而
噓陽和之一律也倘以苦寒峻攻或以瘡瘍例治

是猶渴而飲鴆寧不隨斃乎大抵瘰癧痰核馬刀皆少陽膽氣應逆相火燔蒸治必開結疎利令膽氣通暢結自解矣

結核主方

治相火迫聚津液凝結成核或遶項夾耳或循脇肋不紅不腫不作膿者謂之痰核此痰火之機急宜消散初無痰火之證但見核者宜此主之

玄參一錢五分 忌鐵滋陰降火爲消核之要品

桔梗一錢 爲舟楫之使

連翹帶子一錢五分 開結降火

射干去根一錢 消癭散結

黃芩酒炒一錢 清金降火

海藻 海帶 昆布洗各一錢 取鹹以軟堅

蒲公英一錢 散頸項結核

白僵蠶炒一錢 去風消核

紫背天葵者一錢 消痰散核之要藥

夏枯草乾者一錢 消核散塊

甘草一錢 瀉火緩急

薄荷八分 清上消熱

川貝母一錢 消核清痰解毒

天花粉一錢 消核清熱

牡蠣火煨一錢 頸項核用茶引之脇下核以厚

朴引 壯體實者加酒炒大黃一分

右十七味皆消核之專品作一劑水煎食後入

薑汁竹瀝同服

若核在頸側脇肋少陽之分加柴胡八分在頭項
太陽之分加羌活五分

又結核主方

治結核已潰而有痰火諸證者宜此主之

玄參 桔梗 沙參 帶子連翹 知母蜜炒

天門冬去心 麥門冬去心 陳皮去白 海藻

海帶 昆布各洗 白茯苓 黃芪蜜炙各一錢

貝母

柴胡

甘草各八分

右十六味作一劑水煎食後服仍看核結何分
加引

若氣虛脈微緩者加人參五分他證悉如前痰火
主方例增減

附諸捷方

痰瘤結核大者如拳小者如栗用南星研末醋調
作餅貼之或以艾炷於上日灸三五壯惟使溫散

勿使過熱傷皮後不便灸也

消核散結用大蒜同入茱萸搗塗

枕後腦痺痰核用浮石燒研入輕粉油調塗或

百合同草麻仁研塗

消痰核用夏枯草煎膏貼之數日立消

治結核癰瘍癭瘤神方用海帶海藻昆布海螵蛸

海石各一兩紫背天葵晒乾二兩夏枯草晒乾二

兩連翹帶子二兩貝母一兩桔梗一兩天花粉一

兩皂角刺五錢俱爲細末煉蜜爲丸梧子大每食
後滾白湯下百丸

肺痿肺癰

夫痿之與癰固皆肺病然遡所由則有異矣何也痿
則火鬱氣虛而肺燥癰則火迫血熱而肺潰二者較
若蒼素治寧得無異乎蓋肺體清虛本燥主乎氣金
氣清肅則一呼一吸之間臟腑經絡四體百骸無往
不之而其動靜云爲靡不藉以司用今也火鬱邪壅

致金體燥烈肺氣虛微而敷運停息亦自衰弱不能
充盈百脈乃使筋骨痿痺由是而痿病作焉故經曰
肺傷善痿然金體既傷葉亦焦枯而其息亦不和息
既不利則火邪無從以泄鬱遏薰蒸致咯唾咳嗽血
滲妄行必雲門中府隱痛欬而喉腥脈數而虛以此
爲驗乃曰肺痿證與勞瘵彷彿治當君以養氣佐以
清金而兼攻痰之法則善矣至於肺癰由則不然或
始於風寒襲肺不卽消散致金氣壅遏而復飲酒若

火添油火迫血聚灼而爲癰或素洶酒恣慾致水虧
火熾金傷熱迫血聚結而爲癰種種之因又當辨
證必咳而煩滿心胸甲錯口啖生豆不腥脈數而實
以此爲諦故曰肺癰始則咳血潰久則腐化爲膿脈
訣云瘡浮酒灌穿正此謂也法當君以排膿涼血佐
以保肺清金吳氏所謂肺癰當清其血肺痿宜養其
氣蓋亦得其旨矣

肺痿主方

治肺痿久咳咯吐膿血寒熱自汗脈來

一
弦長緊實有力者

知母一錢去毛蜜炙

清金益肺降火滋陰入咳

肺痿

黃芩一錢蜜炒

主肺痿咳嗽膿血喉腥

麥門冬一錢

清肺治欬吐膿血

天門冬一錢去心皮

保肺氣不被熱擾定喘促

而令氣清

沙參一錢

清熱治久嗽肺痿

五味子二十粒 益水斂肺清金火嗽必用

阿膠一錢蛤粉炒成珠 止肺痿吐血

桔梗一錢 清氣利咽喉爲肺部引經藥

甘草五分 治肺痿膿血

防已一錢 治同上

茯苓一錢去皮 清痰

淡竹茹一團 清金止煩消痰解熱

王瓜子一錢炒 清肺熱消膿血

括蕁仁一錢炒 潤痰止咳

右十四味作一劑水煎服臨服入竹瀝童便

又主方 治陰虛久咳肺痿膿血骨蒸盜汗夢遺等
證脈來芤而虛大或濡緩有力者宜此主之

人參五分 消痰治肺痿久咳咯血

天門冬一錢去心 治同前

款冬花八分 治勞嗽肺痿

麥門冬一錢去心 治同前

五味子二十粒 清金益腎斂肺

栝藁仁一錢炒 治風痰 沙參一錢

蛤蚧一錢 治勞嗽肺痿膿血傳尸骨蒸

阿膠一錢炒 補肺氣止嗽 知母一錢蜜炒

貝母一錢 消痰止咳治肺痿

黃明膠一錢炒 止肺痿消膿血止咳嗽

黃芩一錢蜜炒 治同前 甘草五分 治同前

右十四味作一劑水煎食後服

